



UPA 2019/179

9/4-2019

Nivi Olsen

Qinnuteqartoqartillugu qinnuteqartup qinnuteqarneraniit ullut qulit qaangiunneranni qinnuteqartoq allamik naluaarfigineqarsimangippat qinnutigineqartup inatsisitigut akuerineqartutut isigineqartalernissaa anguniarlugu Kalaallit Nunaannut suliffissarsiortut killilersimaarneqarnissaat pillugu Inatsisartut inatsisaanni § 6 imm. 3 allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Randi Vestergaard Evaldsen aamma Justus Hansen, Demokraatit)

(Siullermeerneqarnera)

Akissaqarusuppugut tungiuinerup pitsanngorsarnissaanut ikiorluarsinnaajumallugit meeqqat sumiginnakkat. Utoqqartagut napparsimasortagullu ataqqinarnerusumik katsorsarneqarsinnaaqqullugit. Aamma meeqqat atuarfiani pisarialinnik pitsanngorsaasinnaajumalluta.

Kisianni allaanngilaq immitsinnut ilaannikkut naallerartartugut. Tassami imaammat, nunatsinni sulliviit ullut tamarluinnaasa aningaasanik annaasaqartarput, pisariaqartitanik avataaneersunik sulisussarsiniartarnermut malittarisassat ajorpallaarmata. Immitsinnut ajoqusersortuarpuqut.

Demokraatinut qularutissaanngilaq nunatsinni sulliviit nunaqavissut sulisorissallugit piumanerummatigit. Akikinnerummat sulliviit atorfinikkiartorluni angalanernut aningaasartuuteqartariaqanngimmata, atorfimmu atattillugu inissaqartitsisisariaqanngimmata ilaalu ilanngullugit. Taamaattuminguna sulliviit nunaqavissunik sulisoqarusunnerusaraluartut.

Kisianni ilaannikkut najukkami sulisussarsiniarneq ajornarsinnaasarpoq aamma taamaattumik sulliviit avataaneersunik sulisussarsiortariaqartarput. Taamatut pisoqartillugu eqaannerusunik periuseqartariaqarpugut, tunisassiorneq uneqqunagu. Eqqaamallugu sulliviit aningaasanik annaasaqarneri tamaasa taava inuiaqatigiit aamma aningaasanik annaasaqartarput, akileraarutitigut isertitat ikinnerulertarmata.

Taamaattumik Inatsisartunut ilaasortat Randi Vestergaard Evaldsenip aamma Justus Hansenip siunnersuutaat manna nuannaarutigaaara, ajornannginnerusumik eqaannerusumillu avataaniik sulisussarsiortarneq pisartussanngussammat.

Inassutigaarput siunnersuut akuerineqassasoq ingerlateqqillugulu Inuutissarsiornermut Ataatsimiititaliamut.